

Tisa LaSorte CEO y presidente nobo di Ahata

ORANJESTAD- Recientemente hunta di directornan di Aruba Hotel and Tourism Association (AHATA) a nombra di Tisa LaSorte como CEO y Presidente di Ahata, esaki lo ta entrante dia 18 di juni 2018. Actualmente Tisa LaSorte ta emplea na Bucuti & Tara Beach Resort como un miembro di nan ekipo di gerencia.

Mester bisa cu e tin un amplio conocimiento den e industria di hospitalidad, gerencia, periodismo y mercadeo. Den su rol nobo, Tisa LaSorte lo enfoca riba atrae mas turismo sostenibel pa garantisa éxito continuo pa nos isla, promoviendo un mane-

ho sensato dedica na turismo, sigurando e miho interes di tur e miembronan di Ahata y sostene envolvimento di henter comunidad. Esaki ta segun e comunicado cu nos a ricibi di Ahata.

"Nos ta masha gradici na Jim, cu a sirbi Ahata y e comunidad grandi di turismo di Aruba pa e ultimo 8 añanan. Nos por mira bek riba algun logro importante bou su liderazgo den area di mercadeo di e isla y den lobby na interes di nos miembronan. Nos ta dese'e tur cos bon den su esfuerzo nobo", asina Tom Calame, presidente di Ahata, a duna di conoce. "Nos ta desea Tisa un caluroso bon bini den e team di Ahata como e CEO y

presidente nobo. Nos ta spera di por sigui traha riba un futuro briyante cu ne."

Tisa LaSorte ta naci y lanta na Aruba. E ta yiu di ex-diputado di turismo y ex-gezaghebber Oscar Henriquez. Despues di a logra su diploma den Broadcast Communication Management, el a inicia su carera como un reportero respeta na TeleAruba, prome cu tempo el a muda pa bay biba na Merca. Durante e 20 añanan cu el a biba na Merca, e tabatin un carera exitoso den maneho di stacionnan di television grandi den noticia y deporte na Chicago y na Phoenix.

